



## Qur'aanni Akkamitti Buufamee?-Kutaa 2

### Description

Wahyiin Qur'aanaa fi hadiisota sirii Ergamaa Rabbii irraa gabaafaman akka of keessatti qabatu kaasne turre. Ergamaan Rabbii (SAW) ofirraa kaasanii waan hin dubbaneef waa'ee amanti ilaachise wanti dubbatan, hojjatanii fi mirkaneessan wahyii Rabbiin irraa isaanitti bu'eedha. Ragaan kanaa:

وَمَا يَنْطِقُ عَنِ الْهَوَىٰ

“[Nabii Muhammad (SAW)] Fedha lubbuu irraa hin haasawu.

إِنْ هُوَ إِلَّا وَحْيٌ مُّوحَىٰ

[Wanti inni dubbatu] wahyi buufamu qofa.” (Suuratu Najm 53:3-4)

Akkuma keeyyata (aayata) lamaan armaan olii irraa hubannu Qur'aanni jecha ykn dubbi Nabiyyiin ofirraa kaasanii dubbatan osoo hin ta'in wahyii (ergaa) Rabbiin irraa bu'eedha. Kutaa darbee keessatti sadarkaalee fi karaalee wahyiin itti bu'u ilaalle turre. Ammas dabalataan akkaata wahyiin gara Ergamaa Rabbitti bu'u ni ilaalla.

Haati mu'mintoota tan taate Aa'ishaan (Radiyallahu anhaa) akka gabaastetti, Haaris ibn Hishaam akkana jechuun Ergamaa Rabbii (SAW) gaafate, “Yaa Ergamaa Rabbii! Wahyiin akkamitti sitti dhufaa?” Ergamaan Rabbis (SAW) ni jedhan: **“Yeroo tokko tokko akka qillisa bilbilaa natti dhufa. Kuni hunda caalaa narratti ulfaatadha. Ergasii narraa cita; wanta inni (malaykaan) jedhe nan qabadha. Yeroo garii immoo Malaykaan namticha fakkaatee na dubbisa. Ergasii wanta inni jedhu nan qabadha.”** Aa'ishaan (radiyallahu anhaa) ni jetti, dhugumatti wahyiin guyyaa garmalee qoraa osoo isarratti bu'uu argee jira. Wahyiin erga dhumate booda dafqii kallacha isaa irraa coccoba.” [Sahih al-Bukhari 2](#), [Sahih al-Bukhari 3215](#)

Asitti bilbila yommuu jedhu telefoona yeroo ammaa harkaa qabnu osoo hin ta'in bilbila sibilaa qillisuudha. Fakkeenyaf, fardoota irraa bilbila qillisu ykn bilbila yeroo durii mana barnootatti itti

fayyadaman. Afaan Amaariffaatin isa “dawul” jennuudha.

Hadiisa armaan olii Aaayatni Qur'aana ni deeggaru. Rabbiin (subhaanahu wa ta'aala) ni jedha:



وَلَنَّهُ لَنْزَلَ رَبُّ الْعَالَمِينَ نَزَلَ بِهِ الرُّوحُ الْأَمِينُ



عَلَىٰ قَلْبِكَ لَا تَكُونَ مِنَ الْمُنْذَرِينَ يُلْسَانٌ عَرَفَتْ شَيْنَ



“Dhugumatti, Qur'aanni buufama Gooftaa addunyaa hundaati.

Ruuhi amanamaa ta'e (Jibriiltu) isaan bu'e (Qur'aana Rabbiin irraa fide).

Akka ati Akeekachisaa irraa taatuf qalpii kee irratti [fide].

Lugaa (qooqa) Arabiffaa ifa ta'een.” Suuratu Ash-Shu'araa 26:192-195

Kana jechuun Qur'aanni Rabbii waan hundaa uumee fi sooru irraa bu'e. Rabbiin akkuma bishaan samii irraa buusun qaama namaatiif jabeenya taasise, Qur'aanas of biraa buusun namootaf qajelcha fi ifa taasise. Qur'aana Rabbiin irraa gara Nabi Muhammad (SAW) itti kan fide (geesse) Malaayka Jibriili. Yeroo darbe Malaaykan Jibriil bifa sadiin gara Ergamaa Rabbii dhufuun ergaa akka itti geessu ilaalle turre. **1ffaa:** Ergamaan Rabbii suuraa dhugaa Jibriil irratti uumame ni argu. **2ffaa:** Suuraa namaa fakkaachun itti dhufuun ergaa itti geessa. Yeroo kanatti Ergamaan Rabbii fi namoonni naannawa san jiran Jibriilin ni argu, dubbii isaa ni dhagahu. **3ffaa:** Malaaykan Jibriil osoo ijaan hin mul'atin Ergamaa Rabbitti wahyii (erga) Rabbiin irraa fida. Yeroo kanatti, Ergamaan Rabbii yommuu wahyiin isatti bu'u akka sagalee qillisa bilbilaa isatti dhagahama. Haalota wahyiin itti bu'u biroo caalaa haalli kuni isarratti ulfaatadha.

Akka yaadannotti osoo Ergamaan Rabbii (SAW) rafan Qur'aanni abjuudhaan isaanitti hin buune. Wanti abjuun isaanitti bu'e Qur'aanan ala wahyii (ergaa) biraati. Fakkeenyaf, banamiinsa Makkaa fi wantoota gara fuunduraatti dhugaan uumaman biroo abjuun argu. Garuu Qur'aanni osoo isaan of beekanii fi hirraba irraa dammaqanii jiranuu isaan irratti bu'a ture.

Qur'aanni waggaa 23f dhawaata dhawaatan, aayaa aayan (keeyyata keeyyataan), boqonna boqonnaan bu'aa ture. Bu'iinsi kuni faaydaa baay'ee qaba. Isaan keessaa: suuta suutan namoota barsiisuf, karaa salphaan namoonni sammuu keessatti akka qabatan (haffazaniif), qalpii Ergamaa Rabbii fi sahaabota isaa tasgabbeessuf, warroota gaafi gaafataniif deebii hatamtamaa kennuu fi kkf.

Haala fi akkaata bu'iinsa Qur'aana hubanne jirraa jechuudha. Amma gaafin ka'u kana fakkaata. (1)- Malaaykan Jibriil Qur'aana Rabbiin irraa gara Nabi Muhammad (SAW) erga fide booda Nabiyyiin hin dagatanii? Aayata fi jechoota wal keessa hin dhayanii? (2)- Ergamaan Rabbii (SAW) barreessuu fi dubbisuun hin danda'an. Kanaafu Qur'aanni akkamitti barreefaman hanga ammaa as gahee? Gaafiiwan kanniin mata-duree armaan gadii keessatti ni deebisna.

### Akkaataa Qur'aanni Walitti Qabamee

Akkuma beekkamu Qur'aanni addaan ciccituun yeroo adda keessatti buufamaa ture. Haa ta'uu malee Qur'aanni tartiiba isaa eeggatee walitti qabame jira. Walitti qabama fi tartiiba Qur'aana bakka lamatti qoonne ilaalu dandeenya. Isaaniis: Qur'aana qomatti qabachuu fi barreefamaan walitti qabuudha. Ammaaf Qur'aanni akkamitti qomatti akka walitti qabame ni ilaalla. Barreefamaan akkamitti akka walitti qabame immoo In sha Allaah kutaa itti aanutti ilaalla.

**1.Qur'aana qomatti qabachuu (haffazuu)**– kana jechuun osoo homaa itti hin dabalin fi hin hir'isin Qur'aana guutuu sammutti qabachuudha. Adeemsi kuni Ergamaa Rabbii (SAW) irraa kaase hanga ammaatti kan itti fufaa jiruudha. Yommuu Jibriil Qur'aana dubbisu akka jalaa hin bannee fi qomatti qabachuuf Ergamaan Rabbii (SAW) arraba isaanii Malaykaa Jibriil waliin sochoosa turan. Garuu Rabbiin adeemsa kana dhoowwun yommuu Qur'aanni qara'amu (dubbifamu) akka cal'ise dhageefatu ajaje. Rabbiin (subhaanahu wa ta'alaa) ni jedha:

فَنَعَلَ اللَّهُ الْمَلِكُ الْحَقُّ وَلَا تَعْجَلْ بِالْقُرْءَانِ مِنْ قَبْلِ أَنْ يُقْضَى  
إِلَيْكَ وَحْيٌ وَقُلْ رَبِّ زِدْنِي عِلْمًا



“Mootiin haqaa Rabbiin ol ta'eera. Osoo buufamni isaa gara kee bu'ee hin xumuramin dura, Qur'aana [dubbisuutti] hin jarjarin. ‘Yaa Rabbii kiyya! Beekumsa naaf dabali’ jedhi.” (Suuratu Xaahaa 20:14)

لَا تُخْرِكْ بِهِ لِسَانَكَ لِتَعْجَلْ بِهِ

“Qur'aana [qabachuutti] ariifachuuf jecha arraba kee isa waliin hin sochoosin.”



إِنَّ عَلَيْنَا جَمَعَةٌ وَقُرْءَانٌ هُوَ

“Dhugumatti, Qur'aana [qalbii kee keessatti] walitti qabuu fi akka dubbistu gochuun Nurra jira.” (Suuratu Al-Qiyaamaa 75:16-17)

**Hubachiisa:** Qur'aana keessatti Rabbiin “Nuti, Nu” yommuu jedhu “Guddinna fi kabaja” agarsiisufi malee baay'inna agarsiisufi miti. Arabiffa keessatti of kabajuuf, “Nahnu (Nuti) ykn Innaa (dhugumatti nuti)” namni tokko ni fayyadama. Fakkeenyaf barreessan kitaabaa, “mata-duree kana jalatti nuti kana ibsinee jirra” jedhee yommuu barreessu ni argina. Rabbiin “Nuti” jedhe fayyadamuun immoo wanta garmalee Isaaf maluu jechuudha. Rabbiin Tokkicha fakkaataa hin qabne fi waa hunda uumudha.

Gara mata-duree keenyatti yommuu deebinu, akkuma keeyyata armaan olii irraa hubannutti Rabbiin Qur'aana guutu qalbii Nabi Muhammad (SAW) keessatti akka walitti qabu itti gaafatamummaa fudhatee jira. Rabbiin wanta hundaa irratti danda'aa waan ta'eef, keeyyata (aayaa) fi boqonnaa Qur'aana yeroo adda addaatti bu'an qalbii Nabiyyii keessatti tartiiban walitti qabe. Kanaafu, aayaa (keeyyata) Qur'aanaa boqonnaa (suurah) ishiif malmu keessatti Rabbiin tartiiba qabsiise jira. Haala kanaan Nabiyyiin Qur'aana guutuu qomatti qabatan (haffazan).

Ergamaan Rabbii (SAW) Qur'aana irraa wanta isaanitti bu'e sahaabota (hiriyyoota) isaanii barsiisaa turaniiru. Sahaabonis Qur'aana haffazanii (qomatti qabatanii) jiru. Isaan keessaa Bukhaarin namoota torba sahihiha keessatti tuqeera. Isaaniis: Mu'aaz bin Jabal, Ubay bin Ka'ab, Zayd bin Saabit, Abdullah bin Mas'uud, Saalim bin Ma'qil, Abuu Zayd bin Sakanii fi Abu-ddardaa fa'aadha.

Kana jechuun namoonni jirenyaa Nabiyyi keessatti Qur'aana haffazan kanniin qofa jechuu miti. Garuu warreen Bukhaarin dubbate torban ykn saddeettan kunniin warra Qur'aana qomatti qabatanii (haffazanii) Nabiyyiin qaraati (dubbisa) isaanii isaaniif dhageefachuun beekkamaniidha. Namoota kanniin ala Qur'aana irraa muraasa ykn guutuu isaa kan haffazan baay'etu jiru.

### **Guduunfaa:**

?Qur'aanni suuta suutan wagga 23f Rabbiin irraa gara Nabii Muhammad (SAW) itti bu'aa tureera. ?Malaaykan Jibril (nageenyi isarratti haa jiraatu) Qur'aana Rabbiin irraa fiduun gara Nabiyyitti geessa. Nabiyyiniis gara namootaatti geessu. Namoonnis Qur'aana isarra barachuun addunyaa guututti geessu. Haala kanaan Qur'aanni addunyaa keessa faca'e. ?Rabbitiin Qur'aana guutuu qalbii Nabiyyii keessatti walitti qabuu itti gaafatamummaa fudhatee jira. Akkasumas, nama Qur'aana qoma keessatti qabachuu fi barachuuf carraaqua Rabbiin akka isa gargaaru fi laaffisuuf waadaa galee jira. Rabbiin (subhaanahu wa ta'alaa) ni jedha:

وَلَقَدْ يَسَرَنَا الْقُرْءَانَ لِلذِّكْرِ فَهَلْ مِنْ مُّذَكَّرٍ  
١٧

**“Dhugumatti, Qur'aana hubachuu fi yaadachuuf laaffifne jirra. Namni ittiin gorfamu jiraa?”**  
Suuratu al-Qamar 54:17

?Kanaafu, Qur'aanni Rabbiin irraa bu'uu keessa shakkiin wayitu hin jiru.

بَارَكَ اللَّهُ الَّذِي نَزَّلَ الْفُرْقَانَ عَلَى عَبْدِهِ لِيَكُونَ لِلنَّاسِ نَذِيرًا  
١

**“Addunyaa hundaaf akekachiisaa akka ta'uuf gabricha Isaa irratti furqaana (Qur'aana) Kan buuse toltuun Isaa baay'atte.”** (Suuratu Al-Furqaan 25:1)

Kana jechuun Rabbiin gabricha Isaa Muhammad (SAW) irratti Qur'aana buusun karaa qajeelaa fi jallinnaa, karaa Jannataa fi ibiddatti nama geessu ifa taasise. Dhugumatti toltuun Rabbii baay'atte.

### **Kitaabban Wabii:**

[Taarikh al-Nuzuulu al-Qur'aan al-Kariim](#)– fuula 26-28, by Mahammad Ra'afat Sa'iid

Hiika Qur'aana Kabajamaa Afaan Oromootiin-Fuula 21-22, Mana Maxxansa Najaashi Akkasumas, bal'innaan Seenan Buufama Qur'aanaa Ingiliffaan dubbisuuf "[History of Qur'anic Text](#)" ilaalun ni danda'ama.

**Date Created**

April 28, 2018

**Author**

admin